

Di nos  
tur

Atraves di  
nos tur

Pa nos  
tur

Programa di gobernashon  
Kolegio Ehekutivo Boneiru

2019-2023



Di nos  
tur

Atraves di  
nos tur

Pa nos tur

# Prólogo



## “Bo meresé un Boneiru sostenibel den un ambiente stabil i prometedor”

*Ku debido orguyo nos ta presentá Boneiru su programa di gobernashon pa e periodo 2019 – 2023.*

Nos a formulá nos programa di gobernashon ku i pa henter komunidad boneriano. Nos a realis'é ku koperashon di hopi di boso, i nos ta agradesido na boso pa esei. Despues di nos yamada pa duna boso aporte na e programa aki, nos a risibí mas ku 100 kontribushon for di henter nos komunidad. Aserkamentu konhunto di un programa di gobernashon ta un di e kondishonnan mas importante pa krea sosten i un implementashon eksitoso.

Di tur e kontribushonnan nos a traha diferente resúmen ku e puntonan mas importante. E puntonan aki bo ta haña bèk den e repartishon den kapítulo di e programa di gobernashon aki. Meta di e programa ta pa krea un Boneiru sostenibel den un ambiente stabil i prometedor kaminda integridat, efektivitat, efisiensia, enfoke riba resultado, transparensia i koperashon ta forma e base.

Ta di importansia ku for di kuminsamentu komunidad sa kua ta e plannan i propósitonan di maneho di Kolegio Ehekutivo, di manera ku kada interesado por sigui esakinan i kaminda ta nesario hala atenshon di Kolegio Ehekutivo

riba esakinan. Konsientemente Kolegio Ehekutivo ta asumí un posishon aksesibel ku e meta pa engrandesé enbolbimentu di tur grupo den nos komunidad ku e programa di gobernashon i entre otro lo desaroyá un plan di komunikashon pa promové esaki.

Nos programa di gobernashon ta basá riba e propio forsia di Boneiru; nos propio identidat, nos kapasidatnan, nos ambishonnan i e amor ku nos tur ta sinti pa Boneiru. Nos ta konsiente di nos potensial konhunto i nos sa ku e posibilidatnan pa desaroyo i kresementu mas aleu ta ilimitá pa motibu di nos aktitut positivo, nos kultura úniko i nos balornan i normanan. Nos ta orguyoso ku nos historia i nos komunidad multikultural i nos tin e propósito fiho pa duna kalidat di bida un impulso.

Konhuntamente ku tur habitante di Boneiru e Kolegio Ehekutivo aki ta deseá di traha riba un futuro sostenibel pa Boneiru den un ambiente stabil i prometedor!

*Kolegio Ehekutivo di Boneiru,  
Gezaghebber*



# Índise programa di gobernashon

<b>Introdukshon</b>	.....	2
<b>Kap. 1</b>	<b>Desaroyo sosial ekonómiko</b> .....	5
<b>1.1</b>	Entrada ku por biba kuné	7
<b>1.2</b>	Desaroyo integral di barío	8
1.2.1	Deporte i moveshon	8
1.2.2	Kuido di salú públiko	8
1.2.3	Kuido pa hende grandi	9
<b>1.3</b>	Kultura i identidat	9
<b>1.4</b>	Maneho di naturalesa i bienestar di animal	9
<b>Kap. 2</b>	<b>Oportunitat pa tur hende pa medio di bon formashon</b> .....	13
<b>2.1</b>	Plan integral di formashon	15
<b>2.2</b>	Plan integral di maneho di hubentut	15
<b>Kap. 3</b>	<b>Desaroyo ekonómiko duradero</b> .....	17
<b>3.1</b>	Plan maestro integral Boneiru 2030	19
<b>3.2</b>	Plan di maneho i di akshon Empresa Mediano i Chikitu	19
3.2.1	<i>One-stop-shop</i>	19
3.2.2	'Startups' i indústria kreativo	19
3.2.3	Produkshon lokal	20
<b>3.3</b>	Plan Maestro Stratégiko pa Turismo i e konsepto di <i>Blue Destination</i>	20
<b>Kap. 4</b>	<b>Infrastruktura bon mantené, duradero, kualitativo i seif</b> .....	23
<b>4.1</b>	Plan di Desaroyo Espasial Boneiru	25
<b>4.2</b>	Nos kamindanan i transporte públiko	26
<b>4.3</b>	Infrastruktura digital	26
<b>4.4</b>	Edifisionan públiko	26
<b>Kap. 5</b>	<b>Bon gobernashon i un aparato gubernamental ku ta funshoná bon</b> .....	29
<b>5.1</b>	Kalidat di aparato gubernamental	31
<b>5.2</b>	Supervishon i mantenshon di lei	32
<b>5.3</b>	Koperashon	32
<b>5.4</b>	Komunikashon	32
<b>Kap. 6</b>	<b>Responsabilisashon finansiero, medionan i faktibilidat</b> .....	35
<b>6.1</b>	Maneho finansiero	37
<b>6.2</b>	Reformashon modelo di entrada	37
6.2.1	Impuesto riba bienes inmóvil	37
6.2.2	Reformashon di impuesto di turista	37
6.2.3	Kompensashon liber	37
<b>6.3</b>	Fuentenan di finansiamentu alternativo	37
<b>Palabra Final</b>	.....	40



# Un Boneiru sostenibel den un ambiente stabil i prometedor!

Esaki ta e vishon di Kolegio Ehekutivo pa e próksimo 4 año.  
Esaki ta entre otro basá riba e kontribushonnan ku komunidad  
a duna na e programa di gobernashon aki.

*Por deskribí e palabranan sostenibel,  
stabil i prometedor komo lo siguiente:*



## Sostenibel

solushonnan sostenibel ku  
ta den ekilibrio ku desaroyo  
ekonómiko i maneho di  
naturalesa i kultura.



## Stabil

bon koperashon,  
sinkronisashon i palabrashon  
entre partidonan na Boneiru,  
Hulanda, den region  
i internashonal.



## Prometedor

stimulá forsa, konosementu i  
abilidadat di kada habitante di  
Boneiru pa konhuntamente  
konstruí un mihó Boneiru.

## Aporte programa di governashon

Mas ku 100 kontribushon Kolegio Ehekutivo a risibí pa e programa di governashon aki. E aporte for di komunidad tabata di gran balor pa klarifiká puntonan di atenshon i stipulá nan urgensia. Banda di e kontribushonnan for di komunidad a hasi uso di Plan Maestro Stratégiko pa Turismo, reportahe di Kolegio di supervishon finansiero (*Cft*), plan di naturalesa, e akuerdo intergubernamental ku a firma ku Reino na novèmber 2018, akuerdo di deporte i prevenshon, informashon di Ofisina Sentral pa Estadística (*CBS*) i e akuerdo di koalishon di *MPB* i *UPB*. Esaki a tradusí su mes den e liñanan prinsipal aki bou, ku tambe ta referí direktamente na repartishon di kapitulo di e programa aki.

## Liñanan prinsipal programa di governashon

- 1 **Desaroyo sosial ekonómiko** - Nos ta promové un entrada ku por biba kuné pa tur hende i un ambiente di biba plasentero i seif.
- 2 **Oportunitat pa tur hende pa medio di bon** - Nos ta krea oportunitat (nobo) pa medio di e '*konsepto di edukashon permanente*'.
- 3 **Desaroyo ekonómiko sostenibel** - Nos ta krea un Boneiru kaminda ta anda na un manera sostenibel ku desaroyo ekonómiko i den ekilibrio ku maneho di naturalesa i kultura. Boneiru komo '*Blue Destination*' ta punto di salida.
- 4 **Infrastruktura konfiabel, pagabel, sostenibel i seif** - Nos ta krea kaminda- i barionan seif i bon, nos ta desaroyá un haf di karga nobo, ampliá aeropuerto, traha riba transporte públiko aksesibel i pagabel i nos ta sòru pa un infrastruktura digital bon i pagabel.
- 5 **Bon governashon i un aparato gubernamental ku ta funshoná bon** - Nos ta sòru pa un governashon transparente i stabil. Nos ta bai kambia aparato gubernamental i hasié un organisashon ku enfoke riba servisio ku ta boga pa dunamentu di servisio ekselente.
- 6 **Responsabilisashon finansiero, medianan i faktibilidat** - Por realisá e ambishonnan mensioná aki riba solamente si maneho finansiero ta na òrdu, si introdusí un modelo di entrada mas sabí i mas hustu pa Entidat Públiko Boneiru i si nos drenta den aliansanan stratégiko ku partidonan nashonal i internashonal.

*E tiponan di aserkamentu aki bou ta forma e base pa nos programa di governashon:*

- Aserkamentu sostenibel; riba un base kontínuo ta boga pa un ekilibrio optimal den interakshon entre e hende, nos isla ku su rikesanan natural i kultural i prosperidat ekonómiko.
- Aserkamentu inovativo; ta hasi uso di konosementu i abilidadat di pasado kombiná ku teknologia i konosementu kontemporáneo.
- Aserkamentu kualitativo; pa haña un ekilibrio optimal entre desaroyo ekonómiko i maneho di kultura i naturalesa ta importante pa hasi e eskohonan korekto a base di investigashon. Den hopi kaso esaki ta nifiká kalidat na lugá di kantidat.
- Edukashon permanente: ta traha riba desaroyo kontínuo riba tantu tereno personal komo profeshonal pa medio di edukashon i trayektonan di desaroyo na midí pa kada edat i nivel.
- Aserkamentu multidisiplinario i integral: Kon nos ta sòru pa desishonnan reinforzá otro? Kon nos ta sòru pa e desishonnan aki ta sinkronisá ku e partidonan involví? Pa esaki Kolegio Ehekutivo ta skohe pa un aserkamentu multidisiplinario i integral pa medio di konsulta ku esnan enbolbí, tantu sektor públiko, sektor privá, NGO-nan, sentronan di konosementu komo suidananonan.

**Programa di governashon mará na e SDG-nan (*Sustainable Development Goals* = Ophetivonan di Desaroyo Sostenibel)**  
E SDG-nan ta konsistí di 17 ophetivo di desaroyo sostenibel ku Nashonnan Uní a formulá pa mehorá kalidat di bida na mundu na aña 2030. Nan ta relashoná ku tur sorto di tema ku tin di aber ku nos bida diario. Entretantu hopi pais, suidat i organisashon a brasa e SDG-nan aki i ta apliká nan den nan maneho.

E programa di governashon aki no sola-mente ta enserá prinsipianan di e SDG-nan, pa kada tema a wak tambe kiko nan ta ni-fiká pa Boneiru i kon nan por konektá proyektonan ku otro ku opviamente ta para lòs for di otro. Un aserkamentu integral ku sinkronisashon ku tantu organisashonnan lokal komo internashonal ta hasi e chèns riba éksito di ehkushon di nos programa di governashon mas grandi.



## Introdukshon

### Akuerdo intergubernamental

Dia 14 di novèmber 2018 Reino i Boneiru a firma un akuerdo intergubernamental pa e periodo 2018-2022.

E akuerdo intergubernamental ta enfoká riba vários tema ku ta di importansia pa bon funshonamentu di komunidad boneriano, esta: reinforamentu di forsa gubernamental, reformashon di struktura di kompanianan anónimo di gobièrnu, reformashon di maneho di dunamentu di tereno, mehorashon di maneho finansiero, desaroyo di turismo i oumento di entrada for di impuesto di turismo, desaroyo sosial ekonómiko, akohida pa mucha, kareteranan i maneho di awa, trabou i entrada, bibienda sosial, i tambe desaroyo di agrikultura, krio di bestia i piskamentu. E temanan aki ta forma e base di e akuerdo intergubernamental.

Kolegio Ehekutivo ta na fabor di un aserkamentu kordiná i pa e motibu ei e ta traha huntu ku Ofisina di Programa Akuerdo Intergubernamental (Programma Bureau Bestuursakkoord) i Reino pa duna ehekushon na e akuerdo intergubernamental. Sinembargo e akuerdo intergubernamental no ta kontené tur tema ku den bista di Kolegio Ehekutivo meresé prioridat. P'esei e programa di gobernashon aki no ta enfoká solamente riba e akshonnan ku e akuerdo intergubernamental ta mensioná, pero tambe riba otro failnan ku pa desaroyo sostenibel di Boneiru ta por lo ménos mésun urgente. Ku no ta mensioná tur punto di e akuerdo intergubernamental den e programa aki, no ta nifiká ku esakinan no ta parti integral di nos programa di gobernashon.

### Dokumentu bibu

A skirbi e programa di gobernashon a base di *'input'* di hopi partido enbolbí. E ta un dokumentu dinámiko i durante e añanan binidero lo monitori'é i adapt'é periódikamente a base di e progreso ku nos ta bai midí.

Pa kada kapítulo ta indiká e áreanan di prioridat mas importante. Seguidamente ta tradusí esakinan den puntonan di akshon entrante ougùstùs 2019, e implikashonnan finansiero ku por vèrwagt i un planifikashon. Banda di esei ta indiká si ya a inkluí puntonan di akshon den e akuerdo intergubernamental. Den konsulta ku e direktoradonan responsabel lo sigui elaborá riba e implikashonnan finansiero dentro di e programa di gobernashon den e periodo binidero. Si ta nesario lo buska posibilidatnan di finansiamentu alternativo, manera entrada èkstra for di impuesto, kompensashon mará na sierto meta stipulá adelantá, konstrukshonnan PPP i fondonan oropeo.

### Programa di gobernashon ta prioridat mas haltu

Kolegio Ehekutivo ta desidido pa realisá e programa di gobernashon inkluso e akuerdo intergubernamental ku e prioridat di mas haltu. Kolegio Ehekutivo ke traha den bon konsulta ku partnènan den Reino na un manera planifiká i kaminda ta nesario hala atenshon di e diferente órganonan di Reino, manera Rijksdienst Caribisch Nederland, Representante di Reino, ministerionan, gobièrnu hulandes i tambe Tweede i Eerste Kamer riba nan responsabilidat spesífiko pa loke ta trata mehorashon di kalidat di bida na Boneiru.

1



# Desaroyo Sosial Ekonomiko

Nos ta promové pa tur hende un entrada ku por biba kuné i un ambiente di biba seif

*Esaki ta tradusí su mes den e siguiente prioridatnan:*

- 1 Un entrada ku por biba kuné i ku ta sufisiente pa hiba un bida salú.
- 2 Desaroyo integral di bario; tantu físikamente komo sosial.
- 3 Kultura, ekspreshonnan folklórico, patrimonio tangibel i intangibel ta haña un ròl prominente den desaroyo di Boneiru.
- 4 Un aserkamentu integral di naturalesa i bienestar di animal den sinkronisashon ku desaroyo sosial ekonomiko sostenibel.

Riba tereno sosial ekonomiko Boneiru ta pará dilanti desafionan grandi, loke ta resultá tambe for di e kontribushonnan di habitantenan di Boneiru na e programa di gobernashon aki. Mas ku 40% di komunidad boneriano tin un entrada ku ta mas abou ku e mínimo di eksistensia (fuente CBS). Kompranan diario, pero tambe koriente i awa a bira mas karu e último añanan. Hopi hende riba nos isla (kasi) no ta logra pa alkansá fin di luna. Kolegio Ehekutivo ta bai atendé integralmente i strukturalmente ku e problemátika doloroso aki, a base di e siguiente puntonan:

## Propio forsa

Pa por ehekutá e prioridatnan menshoná aki riba ta importante ku tur habitante ta konfia den nan propio forsa i abilidad, ku nan ta hunga un ròl aktivo den komunidad i ku nan ta sinti nan mes responsabel pa nan kohabitantenan i nan ambiente di biba direkto. Finalmente nos tur lo tin beneficio

di esei i esei lo yuda desaroyá nos komunidad na un manera duradero. Kolegio Ehekutivo ta haña ku ta tarea di gobièrnu pa fasilitá forsa i potensial di komunidad.

## Partisipashon na komunidad

Pobresa por limitá partisipashon di hendenan den komunidad. P'esei redukshon di pobresa ta un di e prioridatnan mas importante di e Kolegio Ehekutivo aki. Si un hende tin trabou òf algu otro pa e dediká su tempu na un manera útil na dje, esei por hunga un ròl importante. Banda di satisfakshon personal esei ta kondusí tambe na outosufisiensia ekonomiko. Pa oumentá posibilidat di trabou na Boneiru, mester invertí den kresementu ekonomiko i enseñansa (wak kapítulo 2 i 3 di e programa aki), pero tambe den profeshonalisashon di mediashon di labor. Ofresiendo programanan di trabou (jobprograms) i otro formanan di sosten riba merkado laboral, Kolegio Ehekutivo ke stimulá i hasi posibel pa hendenan partisipá den komunidad. Apertura di un sentro di trabou (jobcenter) tambe ta un di e puntonan den e akuerdo intergubernamental.

Na momentu ku tin hende ku no tin òf no por haña trabou, ta importante ku nan ta keda kontribuí na komunidad a base di nan propio abilidadnan. Huntu ku e instansianan konserní Kolegio Ehekutivo ke enbolbí e personanan aki mas tantu posibel serka aktividatnan (di bario) pa utilizá nan talentonan i eksperensianan. Huntu ku e instansianan konserní Kolegio Ehekutivo ta bai duna atenshon na esaki. Den esaki desaroyo integral di bario ta hunga un ròl importante.

## Sosten sosial

Tin gruponan vulnerabel den nos komunidad manera hende grandinan, hendenan ku limitashon, hendenan ku problema di soledat, famianan ku entrada abou, hendenan ku ta víktima di violensia doméstiko i otro gruponan ku mester di sosten sosial. Kolegio Ehekutivo ta bai wak kon por mehorá i/òf fortifiká dunamentu di servisio na e gruponan aki for di Direktorado di Komunidad i Kuido. Banda di esei Kolegio Ehekutivo konhuntamente ku ekspertonan ta bai traha riba un aserkamentu mas efektivu na momentu di konsedé e sosten aki. Por pensa riba por ehèmpel introdukshon di un sistema di ‘buddy’ of kombersashon na kas pa yuda gruponan vulnerabel, inkluyendo aktividatnan den kuadro di e tratado di Nashonnan Uní pa hendenan ku limitashon i otro tratado-nan internashonal pa promové sosten sosial den komunidad.

Kisas mas importante ainda ta ku ta organisá e aserkamentu aki na un manera preventivo tambe pa prevení ku suidadanonan ta resultá den un posishon vulnerabel.

## 1.1 Entrada ku por biba kuné

Un entrada ku por biba kuné ku ta sufisiente pa hiba un bida salú ta un di e prioridatnan mas importante di e Kolegio Ehekutivo aki. Manera a mensioná anteriormente mas ku 40% di kasnan di famia boneriano tin un entrada ku ta bou di mínimo di eksistensia. Kolegio Ehekutivo ta haña esaki inakseptabel: esaki no mester por ta posibel. Tur hende na Boneiru tin derecho riba un entrada ku por biba kuné pa por paga un dak riba nan kabes, proveé den nesidatnan básiko, kumpra alimento salú i partisipá aktivamente den komunidad.

Den koperashon ku ‘*stakeholder*’-nan i Reino ya kaba ta poniendo pasonan konkreto. Por ehèmpel entretanto gabinete a proponé un punto di referensia pa e mínimo di eksistensia. Kolegio Ehekutivo ta mira esaki komo un promé paso den bon direkshon, pero ta di opinion ku esaki ta keda leu ainda for di e mínimo di eksistensia aktual i real. Banda di esei durante e Diálogo Sentral di Boneiru (e órgano di konsulta di doñonan di trabou, sindikatonan, gobièrnu lokal i Kámara di Komèrsio) di 4 di yüli 2019 a anunsiá ku den último lunanan di aña lo hiba konsulta tokante un ‘*Akuerdo Amplio 2020-2023 (Breed Akkoord 2020-2023)*’, un maneho sosial ekonómiko di mas aña pa Boneiru.

Banda di e puntonan aki riba Kolegio Ehekutivo huntu ku Reino i ‘*stakeholder*’-nan ta traha riba e puntonan di akshon aki bou:

- Un forma di fasilidat di desempleo (*werkloosheidsvoorziening – ww*) pa hendenan ku pèrdè nan trabou.
- Introdusi di nobo un forma di ‘*Bon Kompra*’, un makutu ku kompranan básiko kaminda ta palabrá un preis máksimo.
- Introdukshon di un tarheta di rebaho pa hende grandinan.
- Implementashon mas rápido posibel di parti di Reino di e oumento di kompensashon pa yu ku nan a anunsiá, di manera ku esaki ta koinsidí mas òf ménos ku e kompensashon pa yu pa muchanan di 0 pa 4 aña na Hulanda Oropeo.
- Un oumento general di penshun di behes (*AOV*) komplementando e pago èkstra ku Reino a anunsiá pa hendenan ku ta kobra AOV i ku ta biba nan so. Riba esaki Kolegio Ehekutivo ke mira mas komplemento i ke traha den direkshon di un oumento general di AOV.
- Implementashon di un fasilidat básiko integral pa akohida pa mucha den kuadro di e programa *Best4Kids*. Banda di hasi akohida pa mucha mas aksesibel, e areglo ta enserá tambe akohida promé i despues di skol, kon ta atendé ku retraso den enseñansa i desaroyo i dunamentu di kuminda. Mira tambe parágrafo 2.2. Plan di Maneho Integral pa Hubentut.

## 1.2 Desaroyo integral di barío

Kolegio Ehekutivo ta kere den forsa di traha huntú. Nos barionan ta komponentenan indispensable pa un Boneiru ku ta fuerte riba tereno sosial ekonómiko. Pa un gran parti esei ta determiná nos kultura i identidat. Ora ku nos skohe pa desaroyo di barío integral kaminda ta atendé ku tantu aspektonan sosial komo físiko, kalidat di bida den su totalidat ta mehorá. Pensa riba bibienda bon i pagabel, siguridat i koheshon sosial den barío.

Un efekto konkreto di esaki ta ku Sentro pa Maneho di Kriminalidat i Siguridat (*Centrum voor Criminaliteitsbeheersing en Veiligheid - CCV*) den kuadro di e proyekto '*Biba seifna Boneiru*' na luna di novèmber ta bishitá diferente barío di Boneiru pa duna konseho na habitantenan di barío kon pa prevení kiebro. A inkluí e tópiko ambiente seif di biba komo prioridat den Maneho Integral di Siguridat Boneiru 2018-2021.

Na luna di yúni 2019 Kolegio Ehekutivo huntú ku Fundashon Cas Bonairiano i Reino a firma e konbenio Bibienda pa Pueblo na Boneiru (*Volkshuisvesting Bonaire*), pa realisashon di konstrukshon di 500 kas di hür sosial. Tambe ta studiando e posibilidat pa desaroyá un asina yamá '*Family Justice Centre*' (Sentro pa Hustisia Familiar), kaminda diferente organisashon ta traha huntú pa atendé integralmente ku entre otro temanan manera violencia doméstiko i abuso di mucha.

Den desaroyo integral di barío e Sentronan di Barío ta hunga un ròl importante. Gobièrnu ta bai sostené e Sentronan di Barío aki aktivamente pa nan bira sitionan di enkuentro atrobe, kaminda grandi i chikí ta bini huntú pa siña i pasa kontentu (kursonan di outosufisiensi, baile, arte, kultura, músika etc.) Mesora por tradusí esaki tambe den punto di prioridat 3 den e kapítulo aki, kaminda kultura, ekspreshonnan folklórico i patrimonio tangibel i intangibel ta haña un ròl prominente den desaroyo di Boneiru.

### 1.2.1 Deporte i moveshon

Deporte ta hunga un ròl grandi den komunidad. Deporte ta krea laso i ta tene kurpa i mente salú. Deporte ta para pa solidaridat, partisipashon, biba salú, trabou boluntario, akshon, karisma i plaser. Pa medio di un agènda di deporte huntú ku e organisashonnan konserní, Kolegio Ehekutivo ta bai reinforsá i profeshonalisá organisashon di deporte i moveshon (independisá i/òf kuminsá ku un organisashon nobo) i strukturalmente hisa konstrukshon i mantenshon di akomodashonnan di deporte na un nivel mas haltu.

Esaki ta stimulá spesialmente nos hóbennan i ta ofresé nan posibilidatnan nobo pa desaroyá nan mes. Pa adultonan deporte i moveshon mester ta un forma salú di rekreashon, loke ta pas den e maneho preventivo i efektivu di salú di Kolegio Ehekutivo.

Ku e agènda di deporte ta krea un kuadro hurídiko pa stimulá transparensia i trahamentu huntú riba tur nivel.

### 1.2.2 Salubridat Públiko

E palabra klave pa Kolegio Ehekutivo relashoná ku kuido di salú ta prevenshon. Enfokando riba prevenshon di malesa, entre otro pa medio di informashon, deporte i moveshon, partisipashon den komunidad i kome salú, no solamente komo komunidad nos ta bira mas salú, pero tambe nos gastunan di kuido di salú ta baha.

P'esei Kolegio Ehekutivo huntú ku e '*stakeholder*'-nan lo yega na un plan di aserkamentu pa temanan manera kome salú, sobrepeso, importansia di hasi deporte, malesanan transmitibel i uso di droga i alkohòl. Asina ta bini un kampaña intensivo tokante alkohòl i droga ku enfoke riba nos hóbennan. Banda di esei mantenshon di lei pa loke ta trata edat pa konsumo di alkohòl ta bira mas skèrpi. Finalmente ta duna atenshon na desaroyo mas aleu di departamentu di Salubridat Públiko.

Banda di esei kuido pa malesanan (króniko) ta keda haltu riba agènda. Kolegio Ehekutivo ta hasi esfuerso pa mehorashon di koperashon ku Ofisina di Seguro di Kuido Hulanda Karibense (*ZVK Caribisch Nederland*) ku komo meta pa ofresé pueblo un kuido di salú optimal. Fisioterapia i kuido dental ta haña prioridat.

### 1.2.3 Kuido di hende grandi

Dentro di desarojo integral di barío nos hende grandinan ta okupá un lugá spesial. Kolegio Ehekutivo ta na fabor pa laga hende grandinan biba durante mas tantu tempu posibel na kas ku komo meta pa nan utilisá nan propio forsa pa asina nan por partisipá mas optimal posibel na komunidad. E ora ei esei mester ta posibel si. Banda di adaptashon físico di bibienda, e aspekto sosial tambe ta hunga un ròl importante. Mester bini ku un tim di barío sosial (konsistiendo di diferente disiplina) pa sostené hende grandinan a base di nesesidat. Por pensa riba sosten sosial, sosten ku trabou di kas i eventual yudansa ku ta relatá na kuido.

Transporte públiko ku ta fásil aksesibel, seif i pagabel tambe ta nesario pa laga nos hende grandinan partisipá durante mas tantu tempu posibel den komunidad. Durante e añanan binidero Kolegio Ehekutivo lo hasi esfuerso pa esaki tambe. Wak parágrafo 4.2.

Si resultá ku hende grandinan no por biba na kas mas, pero ainda no ta nesario pa bai un kas pa hendenan ku problema ku salú, e ora ei un kas kaminda nan ta haña kuido diario òf un kas den bisindario di un kas di kuido ta un opshon. Na e momentunan aki tin kombensashon ta tumando lugá ku 'stakeholder'-nan pa investigá e posibilidatnan.

## 1.3 Kultura i identidat

Boneiru a skohe pa kresementu ekonómiko sostenibel den ekilibrio ku kultura i naturalesa. Den esaki aspektonan kultural, ekspreshonnan folklórico, patrimonio tangibel i intangibel ta di importansia. Kolegio Ehekutivo ta duna prioridat na esaki kuminsando ku un programa kultural ku entre otro grabashon di ekspreshonnan kultural i folklórico den trayektonan edukativo i ekonómiko. Mantenshon di patrimonio tangibel i intangibel ta haña forma den un archivo bon hinká den otro. Tambe desarojo mas aleu di nos biblioteka i museo ta hunga un ròl den mantenshon di Boneiru su propio kultura.

Idioma ta un parti esensial di kultura. Pa e motibu ei ta di importansia ku ta bini un maneho di idioma insular. Kolegionan Ehekutivo anterior ya kaba a indiká e nesesidat di esaki i e Kolegio Ehekutivo aki ke sigui konkretisá esaki mas aleu.

Banda di aspektonan sosial manera idioma i norma- i balornan, kultura i identidat propio tin un balor ekonómiko tambe. Kolegio Ehekutivo ta duna kultura i identidat propio un ròl (ekonómiko) importante, entre otro den desarojo di turismo i e konsepto di *Blue Destination*. Wak tambe kapitulo 3 di e programa aki.

## 1.4 Maneho di naturalesa i bienestar di animal

Maneho di naturalesa i bienestar di animal meresé atenshon. Entretantu Kolegio Ehekutivo a disidí pa lanta un grupo di trabou bienestar di animal ku entre otro tin komo tarea pa desarojá un plan integral. Banda di esei e grupo di trabou aki lo identifká puntonan problemátiko i hasi proposishon pa aktualisá bienestar di animal den legislashon.

Naturalesa ta un di e balornan mas importante di Boneiru. Kolegio Ehekutivo ta inkluí desarojo sostenibel di naturalesa den tur plan. A firma un akuerdo ku Reino pa entrante 2021 prohibí tur plèstik desechabel. Tambe Kolegio Ehekutivo a tuma e desishon pa kuminsá ku un kampaña '*Tene Boneiru Limpi*'. Den konsulta ku 'stakeholder'-nan Kolegio Ehekutivo ta bini ku diferente plan pa engrandesé konsientisashon tokante kon pa anda ku naturalesa. Pensa riba uso di krema kontra kimá di solo ku ta kontené supstansianan ku ta dañino pa koral.

## Kapítulo 1 // Desaroyo Sosial Ekonómiko

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Un entrada ku por biba kuné ku ta suficiente pa hiba un bida salú	Formulá maneho sosial ekonómiko di mas aña den koperashon ku Diálogo Sentral	Nò	2019 ≥
	Mehorá dunamentu di servisio na gruponan vulnerabel	Parsialmente	2020 ≥
	Instituí sentro pa trabou (jobcenter)	Si	2019 ≥
	Introdukshon di un forma di fasilidat di desempleo (ww)	Nò	2020 ≥
	Introdukshon di un forma di 'Bon Kompra'	Nò	2019 ≥
	Introdukshon tarheta di rebaho pa hende grandinan	Nò	2020 ≥
	Oumentá kompensashon pa yu	Nò	2019 ≥
	Oumento general di aov	Nò	2019 ≥
	Fasilidat integral básiko pa akohida pa mucha	Si	2019 ≥
Desaroyo integral di barío; tantu físiko komo sosial	Plan di aserkamentu desaroyo integral di barío, inkluso (re)aktivashon di Sentronan di Barío	Nò	2019 ≥
	Implementá maneho integral di siguridat Boneiru	Nò	2019 - 2020
	Instituí un 'Family Justice Center'	Nò	2020 ≥
	Desaroyá i implementá un programa integral di deporte pa reinforzá i profesionalisá deporte i moveshon na Boneiru	Nò	2019 ≥
	Desaroyá salubridat públiko mas aleu ku bista riba prevenshon	Nò	2019 ≥
	Programa di konsientisashon alkohòl i droga	Nò	2020 ≥
	Mantenshon di lei edat uso di alkohòl	Nò	2019 ≥
	Plan di mehorashon koperashon ZVK i Entidat Públiko Boneiru	Nò	2019 ≥

## Kapítulo 1 // Desarojo Sosial Ekonómiko

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Desarojo integral di barjo; tantu físiko komo sosial	Instituí tim sosial di barjo pa kuido di hende grandi	Nò	2020 ≥
	Investigá posibilidat kas pa kuido diario pa hende grandi	Nò	2020 - 2021
Kultura, ekspreshonnan folklórico i patrimonio tangibel i intangibel ta haña un ròl prominente den desarojo di Boneiru	Kuminsá ku un programa struktural kultural ku ta konektá ku edukashon i ekonomia	Nò	2020 ≥
	Konkretisá maneho insular di idioma	Nò	2019 ≥
Aserkamentu integral di naturalesa i bienestar di animal den sinkronisashon ku desarojo sosial ekonómiko sostenibel	Instituí grupo di trabou bienestar di animal	Nò	2019
	Desaroyá i implementá plan pa bienestar di animal	Nò	2019 ≥
	Implementá prohibishon di plèstik desechabel entrante 2021	Nò	2019 ≥
	Desaroyá i implementá kampaña 'Tene Boneiru Limpi'	Nò	2019 ≥
	Desaroyá i implementá kampañanan di konsientisashon naturalesa di Boneiru	Nò	2020 ≥





**Mas ku 40%**  
di komunidad  
boneriano tin un  
entrada ku ta mas  
abou ku e mínimo  
di eksistensia.

Kolegio Ehekutivo ta bai atendé  
integralmente i strukturalmente  
ku e problemátika doloroso aki.

2



# Oportunidat pa tur hende pa medio di formashon

Nos ta krea oportunidatnan (nobo) pa tur hende pa medio di e ‘konsepto di edukashon permanente’.

*Esaki ta tradusí su mes den e siguiente prioridatnan:*

- 1 Plan di formashon integral den koperashon ku e ‘stakeholder’-nan mas importante, manera skolnan i empresanan.
- 2 Plan integral di maneho di hubentut, kaminda kada mucha ta haña oportunidat igual pa desaroyá su mes. Tantu na skol, na kas i den komunidad

No ta nos mes ta skohe e lugá kaminda nos ta nase i e promé añanan di nos bida por lo general nos ta pasa serka nos mayornan. E oportunidatnan i posibilidatnan ku ta ofresé nos pa siña i desaroyá te den un grado haltu ta determinante pa restu di nos bida. Siñamentu no ta stòp ora nos kaba skol. Ta importante pa tin e posibilidat pa henter bo bida largu sigui desaroyá bo mes tantu personal komo profeshonal (*life long learning* – edukashon permanente). Esaki ta bira mas i mas importante den e mundu aki ku konstantemente ta kambiando i sigur den e desaroyo pa un Boneiru sostenibel, pa kua uso di teknologianan i konseptonan nobo ta nesario.

## 2.1 Plan integral di formashon

Formashon ta tuma lugá den henter nos komunidad: na kas, na skol, den bario, na klup, huntu ku nos amigunan i na trabou. Bon formashon no solamente ta yuda nos ku trabounan mihó pagá, desaroyo i kresementu, e ta yuda protehá nos identidat boneriano tambe, e ta siña nos norma i balor, konosementu i abilidad i loke ta nifiká pa ta un habitante di Boneiru.

Formashon ta e instrumento prinsipal ku kua nos komunidad por desaroyá den bon direkshon. Sinkronisashon entre mundu empresarial i enseñansa ta esensial. Kua tipo di formashon nos tin ku ofresé pa por hasi e trabounan di futuro? Nos ta skohe pa un plan di formashon koherente kaminda ta enbolbí tantu enseñansa komo sektor privá pa sòru pa un mihó sinkronisashon entre edukashon i merkado laboral. Un pregunta ku mester haña kontesta ta si banda di un skol pa enseñansa profeshonal intermedio (*MBO*), un skol pa enseñansa profeshonal superior (*HBO*) òf universidat i/ òf un sentro di investigashon ta deseabel. Kolegio Ehekutivo ta di opinion ku no por mira esaki lòs for di kresementu ekonómiko sostenibel den ekilibrio ku maneho di naturalesa i kultura.

Importante ta tambe ku hendenan ta keda desaroyá nan mes riba tereno sosial emoshonal, teknológiko i kreativo. Nos no ta siña ku nos kabes so, pero ku nos kurason i ku nos mannan tambe. Por pensa aki riba programanan di empresariado, desaroyo personal i di liderazgo, kursonan di teknologia, programanan di *'21st century skills'* (abilidatnan di siglo 21), kurso pa hendenan ku ta buska trabou, kombatementu di analfabetismo, lès di baile i deporte, seshonnan kreativo òf preparashon pa un funshon den sektor públiko.

## 2.2 Plan integral di maneho di hubentut

Hubentut ta nos futuro. Kada mucha tin (un) talento i ta meresé un oportunidat hustu pa desaroyá su mes kompletamente. Enseñansa mester prepará nos hóbennan pa por partisipá na ekonomia i pa ta eksitoso den bida. Entidat Públiko Boneiru, ministerio di Enseñansa, direktivanan di skol i instansianan (lokal) den bon koperashon ku otro mester ofresé e kondishonnan básiko pa esei. Kolegio Ehekutivo ta enfoká riba mantenshon di enseñansa obligatorio.

Ta intenshon di Kolegio Ehekutivo pa huntu ku organisashonnan di enseñansa i mundu empresarial formulá un vishon riba enseñansa ku tin konekshon ku futuro di nos isla i ku no solamente ta reakshoná riba desaroyonan den enseñansa, pero ku tambe ta buska konekshon ku posibilidatnan i desafionan di merkado laboral. Kolegio Ehekutivo ke konbensé hóbennan ku a despedí pa regresá pa kontribuí na progreso di Boneiru.

Kolegio Ehekutivo ke atenshon spesífiko pa muchanan ku ta lanta den pobresa. 50% di muchanan bou di 11 aña ta lanta den un of otro forma di pobresa. Nan tin dos biaha mas tantu chèns pa komo adulto resultá den pobresa i kriminalidat. E muchanan aki meresé di haña atenshon èkstra i nan tambe mester por partisipá kompletamente ora ta trata di deporte, kultura òf enseñansa. Por realisá esaki pa medio di un tarheta di rebaho i/òf un pakete pa mucha.

E tópiko *'hubentut i siguridad'* ta un di e prioridatnan di e Maneho Integral di Siguridad Boneiru. E enfoke ta den ofresé perspektiva na hóbennan i ponementu di límite na kriminalidat i molèster.

Den e promé lunanan kuminsando for di inisio Kolegio Ehekutivo a pone énfasis riba importansia di akohida pa mucha. Sekretario di estado Van Ark di Asuntunan Sosial i Empleo den luna di yüni 2019 a anunsiá ku e ta bini ku un proposishon di lei pa introdukshon di un fasilidat básiko integral. E areglo ta enserá hasi akohida pa mucha mas aksesibel, pero tambe akohida promé i despues di skol, atendé ku retraso den lès i dunamentu di kuminda.

## Kapítulo 2 // Oportunidat pa tur hende pa medio di formashon

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Hinka un plan integral di formashon den otro i ehekutá esaki den koperashon ku 'stakeholder'-nan	Inventarisashon di e situashon aktual (nulmeting) di trayektonan di formashon na Boneiru	Nò	2020
	Plan di aserkamentu i ehekushon di plan di formashon den sinkronisashon ku 'stakeholder'-nan. Inkluso stipulashon pa HBO/WO/sentro di investigashon i posibilidatnan pa kontrarestá 'braindrain'	Nò	2020 ≥
	Desaroyá i ehekutá programanan pa grandi i chikí ku ta konektá ku nos komunidad di awendia	Nò	2020 ≥
Plan integral di maneho di hubentut kaminda kada mucha ta haña oportunidat igual pa desaroyá su mes. Tanto na skol, na kas komo dentro di komunidad komo totalidat.	Formulá vishon riba enseñansa	Nò	2020 ≥
	Ehekutá i mantené maneho di enseñansa obligatorio	Nò	2019 ≥
	Introdukshon pakete pa mucha	Nò	2020 ≥

3



# Desaroyo Ekonómiko Sostenibel

Nos ta krea un Boneiru kaminda ta utilisá desaroyo ekonómiko na un manera sostenibel ku ta den ekilibrio ku maneho di naturalesa i kultura. Boneiru komo *Blue Destination* ta punto di salida.

*Esaki ta tradusí su mes den e siguiente prioridatnan:*

- 1 Plan maestro integral Boneiru 2030, ku enfoke riba kresementu ekonómiko sostenibel den ekilibrio ku maneho di naturalesa i kultura.
- 2 Un plan di maneho i di akshon pa empresa mediano i chikitu (*SME*), ku entre otro atenshon pa turismo di kalidat i ekoturismo, intensifikashon di produkshon lokal, '*startups*', indústria kreativo, '*cost of doing business*', agrikultura i piskamentu (inovativo), posibilidatnan di invershon, un lokèt pa empresa i un '*one-stop-shop*' pa entre otro pèrmit, operashon komersial i sosten finansiero.
- 3 Plan Maestro Stratégiko pa Turismo i konsepto di *Blue Destination*; desaroyo sostenibel di turismo (krusero) pa medio di mihó posishonamentu, desaroyo di produkto i maneho di dekonstrashon.

Kolegio Ehekutivo ta enfoká riba desaroyo ekonómiko sostenibel den ekilibrio ku naturalesa i kultura. Boneiru tin hopi rikesa natural di gran balor manera solo, biento, un laman relativamente limpi i un parke supmarino bon protehá. Banda di esei nos isla konosé un kultura propio, ku ekspreshonnan folklórico karakterístiko i talentonan kreativo. Tantu físikamente komo digitalmente Boneiru ta konektá ku restu di mundu, di manera ku tin hopi posibilidat inovativo pa stimulá desaroyo ekonómiko sostenibel. Boneiru ta forma un 'hub' ideal pa organisashonnan ku ke hasi negoshi sostenibel ku i/òf via nos isla.

### 3.1 Plan Maestro Integral Boneiru 2030

Vários anáalisis tokante periodonan di gobernashon anterior ta akklará ku a tuma hopi desishon tokante futuro di Boneiru na un manera *'ad hoc'* i sektorial. Mirando e nesidad pa hasi eskohonan di maneho na un manera bon konsiderá, integral i ku sosten amplio, Kolegio Ehekutivo den sinkronisashon ku 'stakeholder'-nan lo formulá un Plan Maestro Integral Boneiru 2030. E plan maestro aki lo ta e *'roadmap'* (dokumentu ku instrukshonnan detayá) a base di kua Kolegio Ehekutivo ta tuma desishon ku ta determinante pa futuro di Boneiru. E 'kick off' di e plan maestro ta tuma lugá na luna di novèmber.

### 3.2 Plan di maneho i akshon pa Empresa Mediano i Chikitu

Empresanan mediano i chikitu ta wesu di lomba di nos komunidat. Serka empresarionan ta eksistí nesidad pa un plan di maneho i akshon pa stimulá ekonomia lokal. *'Cost of doing business'* (gastunan pa hasi negoshi) ta haltu na Boneiru. Kolegio Ehekutivo ta bai skrap reglanan burokrátiko, habri un *'one-stop-shop'* pa empresarionan i krea kondishonnan ku ta stimulá *'startups'* i konseptonan inovativo, indústrija kreativo i agrikultura i piskamentu (inovativo). Banda di esei hasi fluhonnan di finansiamentu alternativo i posibilidatnan di invershon visibel ta di importansia.

#### 3.2.1 One-stop-shop

Un *'one-stop-shop'* ta un lugá kaminda empresarionan por bai pa pèrmit i pa haña e sosten korekto pa kuminsá ku nan negoshi i laga esaki krese. Pa motibunan di transparensia i efisiensia Kolegio Ehekutivo ke digitalisá e *'one-stop-shop'* aki, loke lo sòru tambe ku djafó por atendé ku kompetensia inhuustu.

#### 3.2.2 Startups en creatieve industrie

Stimulashon di indústrija kreativo ta yuda hasi ekonomia mas variá. Bou di indústrija kreativo nos no ta komprende solamente artista, manera pintor òf músiko, pero tambe empresarionan talentoso (hóben/kuminsando) ku ta enfoká riba inovashon teknológiko. 'Startups' ta hunga un ròl importante. Un ehèmpel konkreto ta importashon di outo eléktriko òf introdukshon di sistemanan di *'vehicle2grid'*.

Ora nos atraé *'startups'* i programanan di inkubashon sostenibel i laga nan traha huntu ku organisashonnan lokal nos ta krea mas i mihó empleo. Kolegio Ehekutivo ke posishoná Boneiru tambe komo sitio adekuá pa desaroyá i tèst inovashonnan sostenibel.



### 3.2.3 Produksjon lokal

Boneiru konosé un historia largu ora ta trata di agrikultura, krio di bestia i piskamentu. Na kaminda pa un ekonomia sostenibel Kolegio Ehekutivo ta bai duna mas atenshon na esaki. Nos ta importá kasi tur produkto alimentisio; esei ta karu i no sostenibel. Ademas produksjon lokal ta sòru pa mas empleo nobo.

Kolegio Ehekutivo ta bai drenta den konsulta ku ‘*stakeholder*’-nan pa apuntá terenonan kaminda por praktiká agrikultura i krio di bestia. Kolegio Ehekutivo lo inisiá un fondo di desaroyo pa iniciativanan di agrikultura i hasi esfuerso pa hasi awa i koriente mas barata.

Banda di promoshon di agrikultura lokal, refosterashon di Parke Nashonal Washington Slagbaai i replantashon di palu di mangel i koral meresé prioridat. Esaki no solamente ta kontribuí na un mihó ambiente di biba, e ta hasi Boneiru mas bunita tambe, pa nos mes i pa (eko)turismo.

Mas aleu Kolegio Ehekutivo ta wak den direksjon di solushonnan mas inovativo, manera ‘*hydroponics*’ (kultivá produkto riba solamente awa i nutriente) i forman di ekonomia sirkular. Un ehèmpel konkreto den esaki ta e proyekto di alga den koperashon ku Universidat di Wageningen.

## 3.3 Plan Maestro Stratégiko pa Turismo i konsepto di *Blue Destination*

E Plan Maestro Stratégiko pa Turismo ta trese e ideologianan menshoná aki riba huntun den un vishon stratégiko turístiko (*wak tambe [www.tourismonaire.com/strategic-tourism-plan.pdf](http://www.tourismonaire.com/strategic-tourism-plan.pdf)*). Kolegio Ehekutivo a tuma kontrol riba implementashon di e Plan Maestro Stratégiko pa Turismo i konhuntamente ku e diferente partidonan enbolbí ta bai sigui elabor’é, inkluso e konsepto di *Blue Destination*. Entretantu Kolegio Ehekutivo, komo promé paso, a implementá un oumento di ‘*headtax*’ di \$3,50 pa pasahero krusero. Mester sigui desaroyá tantu e kantidat di bishitante komo e kantidat di barku den ekilibrio optimal ku naturalesa i kultura. Posishonando Boneiru na un manera mas sabí Kolegio Ehekutivo ta pone énfasis riba desaroyo kualitativo di turismo krusero na lugá di kresementu kuantitativo.

Ku e kombinashon di turismo di kalidat i ekoturismo, un bon maneho di desentralisashon, kultura i kreativitat di nos pueblo i uso di proyektonan inovativo i forman di energia sostenibel ta bini mas i mihó kupo di trabou, kosto di bida ta baha i nos ta protehá Boneiru su karakter úniko i su kultura i naturalesa.

## Kapítulo 3 // Desaroyo Ekonómiko Sostenibel

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Plan Maestro Integral Boneiru 2030	Ròndu di inventarisashon 'stakeholder'-nan kon nan ta mira Boneiru na aña 2030	Nò	2019 - 2020
	Formulá plan di aserkamentu i implementá plan maestro	Nò	2020 ≥
Plan di maneho i akshon pa empresa mediano i chikitu (SME), ku entre otro atenshon pa turismo di kalidat i ekoturismo, intensivashon di produkshon lokal, 'startups', indústria kreativo, 'cost of doing business', agrikultura i piskamentu (inovativo), posibilitatnan di invershon, un lokèt pa empresa i un 'one-stop-shop' pa entre otro permit, operashon komersial i sosten finansiero	Ròndu di inventarisashon 'stakeholder'-nan situashon aktual (kiko ta bai bon, kiko ta 'red tape' etc)	Nò	2019 - 2020
	Formulá i ehekutá un plan di maneho i akshon den sinkronisashon ku 'stakeholder'-nan, inkluso un plan di aserkamentu	Nò	2020 ≥
	Bini ku un 'one-stop-shop' pa entre otro pèmit, operashon komersial i sosten finansiero	Nò	2020 ≥
	Bini ku insentivo i ret (network) pa stimulá 'startups' i indústria kreativo na Boneiru	Nò	2021 ≥
	Apuntá tereno pa agrikultura i krio di bestia, den sinkronisashon ku 'stakeholder'-nan	Nò	2020 ≥
	Inisiá fondo di desaroyo pa agrikultura i krio di bestia	Nò	2021 ≥
	Bini ku programa di reforestashon i replantashon pa Parke Nashonal, palu di mangel i koral	Nò	2020 ≥
Plan Maestro Stratégiko pa Turismo i konsepto di <i>Blue Destination</i> ; desaroyo sostenibel di turismo (krusero) pa medio di mihó posishonamentu, desaroyo di produkto i maneho di dekonstrashon	Sinkronisashon mas aleu i ehekushon aserkamentu públiko-privá Plan Maestro Stratégiko pa Turismo i konsepto di <i>Blue Destination</i>	Parsialmente	2019 ≥
	Implementashon Plan Maestro Stratégiko pa Turismo i konsepto di <i>Blue Destination</i>	Parsialmente	2019 ≥

Tantu físikamente komo digitalmente Boneiru ta konektá ku restu di mundu, di manera ku tin hopi posibilidat inovativo pa stimulá desaroyo ekonómiko sostenibel.

Boneiru ta forma un 'hub' ideal pa organisashonnan ku ke hasi negoshi sostenibel ku i/òf via nos isla.

---

4



# Infrastruktura konfiabel, pagabel, sostenibel i seif

Nos ta krea kaminda- i barionan seif i bon, nos ta desaroyá un haf di karga nobo, ampliá aeropuerto, traha riba transporte públiko aksesibel i pagabel i nos ta sòru pa un infrastruktura digital bon i pagabel.

*Esaki ta tradusí su mes den e siguiente áreanan di prioridat:*

- 1 Plan di Desaroyo Espasial Integral Boneiru (Integraal Ruimtelijk Ontwikkelingsplan Bonaire - *ROB*): konstrukshon di un haf di karga nobo, ampliashon di aeropuerto, desaroyo di Kralendijk, Rincon, otro barionan i sobrá puntonan di atenshon infrastrukural i logístiko ku ta importante.
- 2 Aserkamentu integral pa loke ta trata drechamentu di kaminda, siguridat riba kaminda i transporte públiko.
- 3 Mihó organisashon di eksplotashon di banda hanchu (broadband) i nos infrastruktura di fibra óptika i ponementu di internèt di velosidat haltu i konfiabel.
- 4 Plan di mantenshon struktural di edifisyonan públiko i ekipá un edifisio sentral di gobernashon

Un di e temanan mas diskutí riba nos isla ta nos infrastruktura i spesialmente nos ret di kaya i kaminda. Hopi kaya i kaminda ta den un mal estado. Kolegio Ehekutivo ta di opinión ku mester atendé ku esaki na un manera struktural i ku mester hasi eskohonan importante, entre otro aktualisashon di nos plan di tráfiiko.

## 4.1 Ruimtelijk Ontwikkelingsplan Bonaire

E base pa un aserkamentu struktural i integral ta un vershon aktualisá di e Plan di Desaroyo Espasial Boneiru (Ruimtelijk Ontwikkelingsplan Bonaire - *ROB*) pa konstrukshon i drechamentu di kaminda, transporte públiko, kaminda pa baiskel, drèmpel pa tráfiiko i suficiente espasio pa stashoná outo. Tambe ta inkluí konstrukshon di un haf di karga, ampliashon di aeropuerto, desaroyo di áreanan manera sentro di Playa i Rincon i otro trabounan infrastrukturnal den e Plan di Desaroyo Espasial Boneiru. E ordenansa insular a base di kua e transakshonnan di tereno ta tuma lugá ta di 1953. Ta deseabel pa aktualisá e ordenansa aki i lag'é konkordá ku regulashon aktual, manera kodifiká den Kódigo Sivil *BES*, Lei di Finansa Entidatnan Públiko *BES*. Ta formulá un plan di aserkamentu ku komo meta pa durante e añanan binidero por emití suficiente parsela pa konstrukshon di kas i empresa. Kolegio Ehekutivo ta stipulá e plan aki. Ku e plan ta duna ehekushon na e programa di mas aña ya menshoná den presupuesto pa prepará terenonan di gobièrnu pa konstrukshon di bibienda i pa aktividatnan komersial.

Sentro di Playa ta e kurason ekonómiko di Boneiru. E ta di balor históriko tambe i pa e motibu ei un atrakshon pa nos bishitantenan. Ademas e ta e promé paisahe ku pasaheronan di barkunan krusero ta mira na momentu di nan yegada na Boneiru. Dia pa dia sentro di Playa ta bira mas drùk komo konsekuensia di kresementu di e kantidat di bishitante i aktividatnan komersial ku ta oumentando. Ku bista riba futuro i den koherensia ku e Plan Maestro Stratégiko pa Turismo mester implementá e vishon pa sentro di Playa pa laga nos sentro di suidat krese den ekilibrio ku e desaroyonan, sin ku esaki ta afektá su karakter propio.

Un desaroyo di vishon asina mester sosodé pa Rincon tambe, den liña ku e Plan Maestro Stratégiko pa Turismo i desaroyo integral di bario. Rincon ta un bario kaminda tradishonnan bieu di Boneiru ta bon kla presente i p'esei e tin potensial turístiko.

Pa Te Amo Beach mester bini un plan di desaroyo. Tin nesesidat di un lugá pa baha boto (*slipway*) públiko i seif pa tantu boto di piskadó lokal komo boto rekreativo, inkluso suficiente lugá pa stashoná outo. E mihó sitio ta e tereno entre Te Amo Beach i Port Bonaire. Na e sitio aki por traha un 'slipway' ku ta di balor agregá pa tantu boto di piskadó lokal, komo boto rekreativo i boto di servisio. Maneho di e '*slipway*' aki mester keda den man di gobièrnu, òf eventualmente un persona hurídiko ku tin probecho ku mantenshon di e '*slipway*', por hasi esaki ku un akuerdo di maneho.

Debí na kresementu di Boneiru pa loko ta trata kantidat di habitante, tin hopi preshon riba tur fasilitat i naturalesa di Boneiru, entre otro nos playanan. Esaki ta influensia nos flora banda i bou di awa negativamente i ta surgi frikshon entre usarionan regular i e bishitantenan ku ta bini ku barku krusero. Kolegio Ehekutivo ta komprometé su mes pa den koperashon ku Cargill atendé ku rekonstrukshon di Pink Beach.

## 4.2 Kamindanan i transporte públiko

Kolegio Ehekushon ta duna prioridat na transporte públiko bon i pagabel. Entrante 1 di ougùstùs e ordenansa di tráfiiko nobo di Boneiru a bini na vigor pa promové siguridat di tur partisipante na tráfiiko. Na e momentunan aki Kolegio Ehekutivo huntu ku Reino ta inventarisá kua ta e kamindanan ku mester drecha. Den esaki ta inkluí drèmpel, suficiente espasio pa stashoná outo i kaminda pa baiskel. Riba término kòrtiku ta kuminsá ku ehekushon di e promé fase.

## 4.3 Infrastruktura digital

Infrastruktura digital ta importante pa mantené konekshon ku desaroyonan den mundu i fasilidat inisiativanan ekonómiko i tambe inovashon di enseñansa. Internèt bon i pagabel ta haña prioridat. Kolegio Ehekutivo ta haña ku infrastruktura digital mester haña un lugá den Plan di Desaroyo Espasial Boneiru. Kolegio Ehekutivo ta den konsulta ku vários *'stakeholder'* tokante un mihó organisashon di eksplotashon di banda hanchu (broadband) i nos infrastruktura di fibra óptika di manera ku tur habitante di Boneiru tantu na kas komo na trabou ta haña internèt pagabel i di velosidat haltu.

## 4.4 Edifisionan públiko

Edifisionan públiko manera *'Fort Oranje'* i e edifisionan di gobernashon mester ta den bon estado. Pa por duna bon servisio na pueblo i ofresé empleadonan di gobièrnu un klima di trabou adekuá, ta di importansia ku ta drecha i mantené e edifisionan aki. Ta deshasí di edifisionan ku no ta den uso.

## Kapítulo 4 // Infrastruktura konfiabel, pagabel, sostenibel i seif

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Plan Integral di Desaroyo Espasial Boneiru (ROB): konstrukshon di haf nobo, ampliashon di aeropuerto, desaroyo di Playa, Rincon, otro barionan i sobrá puntonan di atenshon infrastrukural i logístiko di importansia	Aktualisá Plan Integral di Desaroyo Espasial Boneiru ku vishonnan di mas nobo	Nò	2020
	Konstrukshon di haf	Nò	2020 ≥
	Ampliashon di aeropuerto	Nò	2021 ≥
	Desaroyá Playa	Nò	2021 ≥
	Desaroyá Rincon	Nò	2020 ≥
	Formulá i ehekutá plan di aserkamentu transakshon di tereno	Parsialmente	2020 ≥
	Formulá i ehekutá plan di desaroyo Te Amo Beach	Nò	2020 ≥
	Rekonstrukshon di Pink Beach	Nò	2021 ≥
Aserkamentu integral pa loke ta trata drechamentu di kaminda, siguridat riba kaya i transporte públiko	Plan di aserkamentu i ehekutá drechamentu di kaminda / siguridat riba kaya	Si	2019 ≥
	Plan di aserkamentu i implementá bon transporte públiko	Nò	2020 ≥
Mihó organisashon di eksplotashon di banda hanchu i infrastrukura di fibra óptika i ponementu di internèt di velosidat haltu, konfiabel i pagabel	Vishon pa futuro i plan di aserkamentu infrastrukura di fibra óptika, inkluso impakto finansiero usarionan	Nò	2020 ≥
Plan di mantenshon struktural pa edifisionan públiko i eskoho pa un edifisio sentral di gobernashon	Plan di aserkamentu i ehekushon di drechamentu di edifisionan públiko i eskoho pa edifisio sentral di gobernashon	Nò	2021 ≥





**Un di e temanan mas  
diskutí riba nos isla ta nos  
infrastruktura i specialmente  
nos ret di kaya i kaminda.  
Kolegio Ehekutivo ta di  
opinión ku mester atendé  
ku esaki na un manera  
struktural.**

Infrastruktura digital ta importante  
pa mantené konekshon ku  
desaroyonan den mundu i fasilidá  
inisiativanan ekonómiko i tambe  
inovashon di enseñansa.

5



# Bon gobernashon i un aparato gubernamental ku ta funshoná bon

Nos ta sòru pa un gobernashon transparente i stabil. Nos ta bai kambia aparato gubernamental i hasié un organisashon ku enfoke riba servisio ku ta boga pa dunamentu di servisio ekselente.

*Esaki ta tradusí su mes den e siguiente prioridatnan:*

- 1 Ehekushon di e akuerdo intergubernamental pa fortifiká forsa gubernamental i forsa di ehekushon. Tantu pa loke ta trata forsa di ehekushon komo pa loke ta trata integridat aparato gubernamental mester skor haltu.
- 2 Programa pa halsa kalidat di aparato gubernamental (empleado, produkto, prosedura) pa medio di entrenamentu kontínuo, tantu pa loke ta trata formashon di nos hendenan, i tambe pa loke ta trata uso di teknologianan nobo (*e-governance*) pa hasi produktonan, dunamentu di servisio i proseduranan mas fásil, drecha nan i hasi nan mas transparente, den koperashon ku entre otro Reino.
- 3 Duna kontenido na koperashon regional i internashonal dinámiko (públiko/privá/NGO-nan) pa stimulá ekonomia i kompartí konosementu pa desaroyo sostenibel.
- 4 Den koperashon ku Reino formulá i ehekutá un strategia di komunikashon sólido. Mester informá habitantenan bon tokante maneho ku tantu Reino komo Entidat Públiko Boneiru ta ehekutá.

Bon gobernashon no ta un meta riba su mes, pero un medio pa realisá e ophetivo final ‘dunamentu di servisio ekselente na tur habitante’.

## 5.1 Kalidat di aparato gubernamental

Pa realisá e aspirashon di un aparato gubernamental ku ta funshoná optimalmente, ta di importansia krusial pa konbensé nos aparato gubernamental kompleto di e echo ku ta un privilegio pa por sirbi komunidad.

*Bou di bon gobernashon Kolegio Ehekutivo ta komprende:*

- Efektivo i efisiente; sostenibel i disidido
- Transparente i íntegro (= adekuá i desente)
- Inspirativo, inovativo i enbolbí
- Ta komuniká habrí i intensivo ku suidananon tokante maneho, metanan i resultadonan; mester por midí prestashonnan i mester ta efikas

Kolegio Ehekutivo ta mira bon gobernashon komo un kondishon fundamental pa e desaroyo sostenibel di Boneiru i pa e motibu ei a indiká bon gobernashon komo un di e prioridatnan mas haltu. Un aparato atministrativo bon organisá ku prestashonnan institushonalisá ku por midí ophetivamente (*SMART*) i strukturanan di responsabilisashon ta di importansia krusial pa por garantisá dunamentu di servisio ekselente. Kapasidat di ehekushon, determinashon i solides di e aparato ta kondishonnan básiko esensial. Pa e motibu aki tambe Kolegio Ehekutivo a disidí pa laga investigá tur kompania anónimo di gobièrnu i intervení kaminda ta nesesario, manera resientemente a pasa na *BIA* i *OTB*.

Gobièrnu ta partisipá den kompanianan anónimo di gobièrnu pa alkansá metanan sosial ku no por keda alkansá di un otro manera. E akuerdo intergubernamental ta mensioná ku ta hasi un investigashon relashoná ku partisipashon di gobièrnu (kompanianan anónimo i fundashonnan). Pa kompanianan anónimo vital (aeropuerto, haf i telekòm) ta hasi un eksplorashon pa haña partnernan stratégiko pa garantisá kontinuidat, bon servisio i preis pagabel.

Kaminda ku basenan di ekonomia empresarial i sosial ta bini huntu na un manera profeshonal mester duna direkshon na e kompanianan di gobièrnu aki. Entidat Públiko Boneiru ta deseá di organisá esaki bon pa medio di:

- Monitoriá e skema di renensia i nombrashon pa miembronan di Hunta di Komisario
- Yuda forma miembronan nobo di Hunta di Komisario ku e meta pa krea un grupo di profeshonal (di *young professionals* te penshonadonan) pa por okupá funshonnan di Hunta di Komisario
- Organisá puntonan di kontakto fiho dentro di organisashon di Entidat Públiko Boneiru pa mehorá e partisipashonnan i pa por sostené nan.
- Duna sosten ora di monitoriá maneho di dividendo
- Duna sosten ora di aktualisá statutonnan nobo òf adaptá
- Ta na altura di legislashon i regulashon nobo i *'corporate governance'* ku e kompanianan anónimo di gobièrnu mester implementá
- Monitoriá entrega na tempu di plannan anual i kuantanan anual
- Formulá un instrumento di duna direkshon (strategia di akshonista) pa kada kompania anónimo di gobièrnu ku ta kontené e ophetivonan sosial i e maneho di dividendo.
- Monitoriá ku tur kompania anónimo di gobièrnu ta implementá e Kódigo di *'Corporate Governance'* Boneiru rápidamente i na un manera profeshonal si esaki no a tuma lugá ainda.

## 5.2 Supervishon i mantenshon di lei

Bon supervishon i mantenshon di lei ta un di e aspektonan mas importante pa krea un Boneiru sostenibel den un ambiente stabil i prometedor. Esaki ta impliká tambe un komunidat seif. Formalmente Direktorado di Supervishon i Mantenshon di Lei ta kai bou di gezaghebber – komo miembro di Kolegio Ehekutivo – pa loke ta trata e tareanan di supervishon riba órden públiko i siguridat.

Gezaghebber tin tambe e ròl di duna direkshon ora di desaroyá un maneho integral di siguridat. E maneho integral di siguridat pa Boneiru (integraal veiligheidsbeleid voor Bonaire - *IVBB*) aki ta stipulá pa e periodo di 2018 te ku 2021. Den e *IVBB* a inklui e ophetivonan riba tereno di siguridat. Entidat Públiko Boneiru ta sòru pa sinkronisashon ku e partnernan den e kadena di siguridat manera kuerpo polisial *KPCN* i Ministerio Públiko. A stipulá e medidanan konkreto riba tópikonan priorisá den e plan (anual) di ehekushon. Pa e periodo binidero a priorisá e siguiente tópikonan: hubentut i siguridat, ambiente di biba seif i siguridat di tràfiko. Den e plan di ehekushon a proveé e tópikonan aki di medidanan preventivo i represivo.

E prioridat mas importante pa loke ta trata supervishon i mantenshon di lei ta serka prevenshon: sòru pa intervenshon no ta nesario, promoviendo ku tur hende ta realisá ku kumplimentu ku regla (di siguridat) ta na interes di kada hende i di nos tur.

Maneho preventivo ta importante pa priorisashon di tareanan di supervishon i pa hasi uso di forsa laboral riba e diferente áreanan di inspekshon. Anualmente stipulashon di prioridat conforme maneho mester tuma lugá huntu ku e partnernan eksterno di mantenshon di lei hasiendo uso di resultadonan lográ i infrakshonnan. Kolegio Ehekutivo ta suprayá nesidat di bon komunikashon i koperashon komo ekstenshon di e strategia di kumplimentu ku lei. Pa medio di informashon aktivo Kolegio Ehekutivo ke redusí infrakshon i promové komportashon di kumplimentu ku lei. Si tòg mester entervení, ta hasi uso di e prinsipio di ‘suave ora por i duru ora mester’. Ora di determiná i stipulá prioridat den un programa anual di mantenshon di lei, ta tene kuenta ku e metanan stipulá i e prioridatnan di den Programa di Gobernashon.

## 5.3 Koperashon

Kolegio Ehekutivo ta di opinion ku koperashon ta un di e kondishonnan pa yega na un Boneiru sostenibel den un ambiente stabil i prometedor. Kolegio Ehekutivo ta konsiente ku den esaki partnernan lokal ta hunga un ròl hopi importante. P’esei Kolegio Ehekutivo ta suprayá e importansia di un Diálogo Sentral ku ta funshoná bon i Kolegio Ehekutivo ta boga pa dunamentu di konseho konhunto den Diálogo Sentral tokante tópikonan sosial ekonómiko.

Kolegio Ehekutivo ta mira espasio pa duna contenido na koperashon regional i internashonal, tantu públiko i privá komo ku NGO-nan pa kompartí konosementu i stimulá desaroyo. A base di e Plan Maestro 2030 i eventual desafionan dentro di ehekushon di e áreanan di prioridat di e programa di gobernashon aki, Kolegio Ehekutivo ta bai buska partnernan stratégiko ku por yuda desaroyá Boneiru mas aleu. Por pensa riba konekshonnan ku Ophetivonan di Desaroyo Sostenibel (*Sustainable Development Goals*), e Plan Maestro Stratégiko pa Turismo i partidonan ku ta enfoká riba desaroyo sostenibel.

Ta hasi e relashon ku fundashonnan internashonal mas estrecho, tantu pa optené sosten finansiero, komo pa kompartí konosementu i eksperensia. Den e cuadro aki Kolegio Ehekutivo ta pensa riba lantamentu di un fundashon ku si e kumpli ku kondishonnan internashonal e por bini na remarke pa sosten finansiero.

Den pasado a firma protokòl ku partnernan stratégiko, por ehèmpel ku Aruba a firma e ‘*protokòl di fraternidat*’. Kolegio Ehekutivo ta bai renobá e forman di koperashon aki, basta si nan ta kuadra ku e meta di desaroyo sostenibel.

## 5.4 Komunikashon

Debí na e struktura estatal di Boneiru komo Entidat Públiko den pais Hulanda, tin ora ta difisil pa suidadanonan i empresarionan komprendé dikun asuntunan ta reglá di un serto manera.

Kolegio Ehekutivo, den koperashon ku Reino, pa medio di informashon ta bai informá suidadanonan i empresarionan tokante maneho di Reino i Entidat Públiko Boneiru i ken ta responsabel pa kiko. Den kampañanan di konsientisashon Kolegio Ehekutivo ta mira un instrumento efektivo pa enbolbí henter nos komunidat ku un Boneiru ku ta dushi pa biba riba dje. Pa ofresé mas komprension tokante kon gobièrnun ta traha i na mes momentu engrandesé enbolbimentu di komunidat ku gobernashon, Kolegio Ehekutivo ke fasilitá lantamentu di un parlamento hubenil.

## Kapítulo 5 // Bon gobernashon i un aparato gubernamental ku ta funshoná bon

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Ehekushon di akuerdo intergubernamental pa fortifikashon di forsa gubernamental i forsa di ehekushon	Wak akuerdo intergubernamental ( <a href="http://www.eilandsraad.com/Bestuursakkoord_2018_2022">www.eilandsraad.com/Bestuursakkoord_2018_2022</a> )	Si	2018 - 2022
Programa pa halsa kalidat di aparato gubernamental (empleado, produkto, prosedura) pa medio di entrenamentu kontínuo, tantu pa loke ta trata formashon di nos hendenan, i tambe pa loke ta trata uso di teknologianan nobo (e-governance) pa hasi produktonan, dunamentu di servisio i proseduranan mas fásil, drecha nan i hasi nan mas transparente, den koperashon ku entre otro Reino.	Plan di aserkamentu i implementashon pa halsa kalidat di aparato gubernamental	Parsialmente	2019 ≥
	Investigá kompanianan anónimo di gobièrnu	Parsialmente	2019
	Plan di aserkamentu i implementashon pa bon gobernashon den kompanianan anónimo di gobièrnu	Ja	2019 ≥
	Ehekutá Maneho Integral di Siguridat Boneiru	Nò	2019 - 2021
	Plan di serkamentu digitalisashon pa mehorá dunamentu di servisio i proseduranan i hasi nan mas fásil i transparente	Parsialmente	2020 - 2021
	Implementashon 'E-governance'	Parsialmente	2021 ≥
Entrenamentu empleadonan di Entidat Públiko Boneiru	Parsialmente	2020 ≥	
Duna kontenido na koperashon regional i internashonal dinámiko (públiko/privá/NGO-nan) pa stimulá ekonomia i kompartí konosementu pa desaroyo sostenibel.	Desaroyá i ehekutá plan stratégiko kua partidonan internashonal ta drenta koperashon kuné (den sinkronisashon ku plan maestro 2030)	Si	2020

## Kapítulo 5 // Bon gobernashon i un aparato gubernamental ku ta funshoná bon

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Den koperashon ku Reino formulá i ehekutá un plan di komunikashon sólido. Mester informá habitantenan bon tokante maneho ku tantu Reino komo Entidat Públiko Boneiru ta ehekutá.	Formulá i ehekutá plan di komunikashon di Entidat Públiko Boneiru	Nò	2020 ≥
	Kampañanan di konsientisashon pa komunidat tokante diferente aspekto di maneho (tantu proseso komo kontenido)	Parsialmente	2020 ≥
	Entrenamentu bon gobernashon pa habitantenan di Boneiru	Nò	2021

6





# Responsabilisashon finansiero, medionan i faktibilidat

Por realisá e ambishonnan menshoná aki riba solamente si maneho finansiero ta na òrdu, si introdusí un modelo di entrada mas sabí i mas hustu pa Entidat Públiko Boneiru i si nos drenta den aliansanan stratégiko ku partidonan nashonal i internashonal.

*Esaki ta tradusí su mes den e siguiente plan di akshon:*

Kon ta finansia e áreanan di prioridat di den e programa di gobernashon aki? Pa medio di implementashon di un plan di akshon, kaminda ta:

1. Pone maneho finansiero na òrdu.
2. Reformá modelo di entrada (impuesto lokal).
3. Buska fuentenan di finansiamentu alternativo (entre otro Reino i Union Oropeo)

1. Hasi maneho finansiero di Entidat Públiko Boneiru komprendibel i pon'é na òrdu.
2. Reformá e modelo di entrada.
3. Buska fuentenan di finansiamentu internashonal alternativo, manera Reino i Union Oropeo.

Huntu ku e diferente servisionan i otro *'stakeholder'*-nan Kolegio Ehekutivo ta bai identifká kiko entre otro lo ta e impakto finansiero di e prioridatnan manera notá den e programa di gobernashon aki.

## 6.1 Maneho finansiero

Pa Kolegio Ehekutivo a bira klarito kiko e situashon finansiero di Entidat Públiko Boneiru ta i Kolegio Ehekutivo a definí e áreanan di prioridat menshoná aki riba (reformá modelo di entrada i fuentenan di finansiamentu alternativo) pa hasi presupuesto di Entidat Públiko Boneir salú atrobe.

## 6.2 Reformá modelo di entrada

E dos aspektonan mas importante ta optimalisashon di maneho di kobransa i restrukturashon di algun tipo di impuesto i otro fluhonan di plaka públiko, entre otro:

### 6.2.1 Impuesto di propiedat inmóbil

Aktualmente impuesto di propiedat inmóbil ta bai pa Kaha di Reino, esaki kontrario na loke ta e kaso ku munisipionan na Hulanda Oropo. E impuesto aki anualmente ta generá 12 mion dòler ku den e situashon aktual Kolegio Ehekutivo no por usa pa prioridatnan insular.

### 6.2.2 Reformashon di impuesto di turista

No ta kobra impuesto di turista efektivamente, di manera ku mas òf ménos 3 mion dòler pa aña no ta bin na benefisio di komunidad. Ta nesario pa modernisá impuesto di turista pa tantu turismo *'stay over'* komo turismo krusero.

Kolegio Ehekutivo a realisá un promé oumento di 'head tax' ku a bira \$3,50 pa kada pasahero krusero. Den futuro serkano lo sigui un otro oumento.

### 6.2.3 Kompensashon liber

Kompensashon liber ta un kompensashon riba presupuesto ku e entidatnan públiko ta risibí di Reino pa por ehekutá e tareanan ku ta kai bou di responsabilidad direkto di gobièrnu lokal. Estudionan di Nibud i Ideeversa ta mustra ku e kompensashon liber ta muchu abou pa por kubri tur tarea di gobièrnu lokal. Konforme kalkulashonnan ophetivo e kompensashon liber ku Boneiru ta haña ta 5 mion dòler di ménos. Tokante esaki Kolegio Ehekutivo ta bai hiba kombersashonnan intensivo ku gobièrnu hulandes.

## 6.3 Fuentenan di finansiamentu alternativo

Banda di e medidanan di efektividat i efisiensia ku Entidat Públiko Boneiru mes por (i mester) tuma pa hasi situashon di nos isla mas salú, Kolegio Ehekutivo ke enfoká tambe riba fuentenan di finansiamentu alternativo, manera fondonan di Union Oropo.

Pa esaki ta nesario si ku ta enbolbí 'stakeholder'-nan lokal i internashonal. Huntu ku su organisashon administrativo Kolegio Ehekutivo ta bai desaroyá esaki pa yega na un plan di aserkamentu.

Si despues di inventarisashon di e impakto finansiero di e áreanan di prioridat den e programa di gobernashon aki resultá ku e medionan no ta sufisiente, e ora ei ku un plan di aserkamentu sólido Kolegio Ehekutivo lo bai den kombersashon ku Reino.

## Kapítulo 6 // Responsabilisashon finansiero, medionan i faktibilidat

Áreanan di prioridat	Puntonan di akshon	Parti di akuerdo intergubernamental	Periodo di ehekushon
Pone maneho finansiero na òrdu	Trese klaridat den situashon aktual i posibilidatnan pa futuro di entradanan di Entidat Públiko Boneiru	Parsialmente	2019
Reformá modelo di entrada (impuestonan lokal)	Formulá i desaroyá plan di Maneho Finansiero 2.0	Parsialmente	2019 - 2020
	Implementá optimalisashon di maneho di kobransa	Parsialmente	2020 ≥
	Impuesto di propiedat inmóbil pa Boneiru	NÒ	2020 ≥
	Reformá impuesto di turista	Si	2019 ≥
	Oumentá kompensashon liber	NÒ	2020 ≥
Enfoke riba fuentenan di finansiamentu alternativo (entre otro Reino i Union Oropeo)	Plan di aserkamentu di implementashon enfoke riba diferente fuentenan di finansiamentu	NÒ	2019 ≥



# Palabra final

Un biaha mas Kolegio Ehekutivo ta ekspresá su gratitut pa tur kontribushon ku a drenta for di komunitat boneriano pa duna forma na e programa di gobernashon aki. Un programa di gobernashon ku un vishon klarito: Un Boneiru **sostenibel** den un ambiente **stabil i prometedor!**

Nos por realisá e vishon i ambishon ku nos programa di gobernashon ta ekspresá solamente si huntu ku tur sektor di nos komunitat nos pone nos skouder bou di dje. E kombinashon di un Konseho Insular fuerte, un gobièrnu

dinámiko, desididu i kolegial i 'stakeholder'-nan motivá ku ta traha bon huntu pa logra e resultadonan deseá tambe ta di importansia.

Kolego Ehekutivo ta hasi un yamada na tur hende pa duna nan aporte na ehkushon di e programa di gobernashon aki i konhuntamente konstruí un Boneiru sostenibel den un ambiente stabil i prometedor! Di nos parti nos ta primintí di hasi tur loke ta na nos alkanse pa mehorá kalidat di bida di tur hende na Boneiru.

---

Di nos  
tur

Atraves di  
nos tur

Pa nos  
tur

